

## REGIONAL NEWS

HEADLINES:-

1. Chief Minister Pu Lalduhoma chuan Myanmar atanga Mizorama raltlan te chhinchhiahna tur bik, Biometric Enrolment Portal siam a nih tawh thu leh a taka an kalpui thuai tur thu a sawi.
2. Lai Autonomous District Council a Chairman Pu VL Hmuaka chuan LADC ah Sorkar thar a piang thei ta chu lawmawm a tih thu a sawi.
3. Union Ministry of Home Affairs chuan Citizenship (Amemdment) Rules 2024 dan hmanga khua leh tui nihna a pek hmasak berte vawiin khan tihchhuah a ni..
4. Nizan atanga Rajasthan-a thir laihchhuahna khura tang Hindustan Copper Limited official 15 te chu vawiin khan him taka chhanchhuah an ni.

&lt;&gt;&lt;&gt;&lt;&gt;

CM & CYMA

Chief Minister Pu Lalduhoma chuan Myanmar atanga Mizorama raltlan te chhinchhiahna tur bik, Biometric Enrolment Portal siam a nih tawh thu leh a taka an kalpui thuai tur thu a sawi.

Vawiina Central YMA hruaitute nen an inkawmnaah he thu hi Chief Minister chuan a sawi a, Mizorama Ruihhlo dona lama hma latu State Level Core Committee pawh a rang lama koh tha a tih thu a sawi bawk.

Central YMA hruaitute hian, Myanmar atanga lo kal mi thenkhatte chungchang te, tun hnaia ILP dan bawhchhia engemawzat an man avanga mumal zawka ILP regulation kalpui tha an tih thu te leh Ruihhlo Do Core Committee kalpui thar leh tha an tih thute an thlen a ni.

&lt;&gt;&lt;&gt;&lt;&gt;

CM

Chief Minister Pu Lalduhoma chuan vawiin vek khan a office ah Mizoram Chamber of Commerce & Industry hotute a kawm a. Commerce leh Industry lama Mizoram hmasawna tur rawtna an neih hrang hrang te a sawipui.

MCCI hruaitute hian, Mizorama Cooperative Society hmanga mipuite tana awlsamna thlen theih dan te, Mau behchhan Industry dintute tana dawr ber tur Department neih tul an tih thute, Industrial Area chungchang te, Consultancy Firm leh Registered Contractor te inkara harsatna awm thei te, Tender chhangtute tana Work done certificate phut chungchang te, Mizoram chu financial literacy rate kan hniam avanga bank loan lak a har thu te, Inner Line Permit kalpui dan tha nia an hriat an rawtna te, EDP leh ESDP training hi department pakhat hnuaiawm thei se thaa an hriat thute, SRI Scheme Hand Holding Policy nena kal kawptir theih an rin thu te, Bangladesh nena insumdawn tawna chungchang te leh thil pawimawh dang te an thlen a ni.

Chief Minister hian an rawtna te chu an lo zirchian tur thu a hrilh a. Chief Minister hi Pi R. Lalrodingi, OSD to CM chuan a tawiawm a ni.

<><><>

### LADC

Lai Autonomous District Council a Chairman Pu VL Hmuaka chuan Lai Autonomous District Council ah Sorkar thar a piang thei ta chu lawmawm a tih thu a sawi a.

Pu VL Hmuaka hian vawiin khan a Chamber ah Lawngtlaia thuthar thehdarhtute kawmin, Sorkar a mumalloh chuan mipui ten an tuar thin a, LADC ah Sorkar thatak CEM viaktha leh kumlam ah pawh la naupang, thalai sukthlek hria an nei chu thil lawmawm tak a ni a ti.

Chanchinbumite zawhna chhangin Pu V.L.Hmuaka chuan MLA leh MDC chu a nihkawp theihloh tih District Council inekawlina dan ah a awmlo tih sawiin, MDC nilai, MLA a thlantlin an lo awmfo tawh a, hengte hian MDC zawk bansanin MLA an nizui tlangpui a ti a, a chhan ber chu duhamna rawngkai leh midang chherchhuahna kawng daltu anga an lantheih vangin nihna chelhkawp chu tih awma an ngaihloh vang a MDC zawk bansan thin an ni a ti.

Hetihlai Lai Autonomous District Council a Chief Executive Member thar Pu C.Lalmuanthanga chuan CEM atan lakluh a nih hnu ah nimin tlai hian Lairam Motherless Home a tlawh.

C.Lalmuanthanga chuan Pathian malsawmna leh duhsakna changa Chief Executive Member atan lakluh a nih hnu ah, enkawltu Nu leh Pa neilo, hnuchamte chu an tan titheih liantak neilo mahse, a thinlungah ngaih pawimawhna liantak awm chu hlenchhuah duhin Lairam Motherless Home chu tlawh a nih thu a sawi.

Pu C.Lalmuanthanga chuan Lairam Motherless Home a thawkte inpekna chu chhuanawm a tih thu sawiin, tihve theih a neih apiangah an tan theihtawp chhuah a inhuam thu a sawi.

CEM hi a nupui Pi L.S. Pari leh United Legislature Party a hruaitu thenkhat ten an tawiawm a, Motherless Home tanpui nan CEM hian Rs. 10,000/- thawktute hnenah a hlan a ni.

<><><>

### DIRECTOR

Mizoram Akashvani Director (Eng) & Cluster Head Pu D R Lalropuia chu Deputy Director General (DDG) Engineering ah a kaisang a,

Pu D R Lalropuia hi kum 1997-a Indian Broadcasting Engg Service officer a lut a ni a, ramchhunga Prasar Bharati hnuaiyah Engineer hna hrang hrang a chelh tawh a ni.

<><><>

## MAMIT

Mau/Rua tam tirh a awm thin Thlangdar chi khat Thangnang chu tunlai hian Mamit leh a chhehvelah a puang nasa hle tih Mamit-a kan corr chuan a sawi a, thangnang te hi khawngin a hriak sawrin an hralh thin a ni.

Thlangdar chi khat Thangnang te hi rua/mau tam tirhin an puang thin a, tun tuma puang hian awmzia a neih leh neih loh chungchangah mithiamte thlirna tun dinhmunah hriat a la ni rih lo a ni.

Thangnang an puan hian thingkungah te a hu hovin an kai thin a, hei hi an man khawm a, sumah an den sawm hnuah tuisoah emaw tui nen an chhuangso a, a hriak an teng hnuah chawhmehah an hmang thin a ni.

Thangnang hriak pawh hi hralh chhuah thin a ni a, tunlai hian no khat cheng 50 in an zuar thin a ni.

<><><>

## MERI LIFE AMPLIFICATION

Lunglei Zotlanga 20 Bn BSF te chuan nimin leh vawiin khan 'Meri Life Amplification Plan -2024' hnuaih Zotlang leh Pukupui inkar NH 54 huam chung hmun thenkhat an tifa a, tualchhung mi thahnem takin hnatlang hi an tawiawm a ni.

Commandant Neeraj Sharma chuan hnatlanga thawkchhuak te chu hna zahawm tak thawk an nih thu sawiin, India Prime Minister Narendra Modi hmalakna 'Swachhata Bharat' kalpui mek tih hlawhtlinna pawimawh tak pakhat a ni a ti. Faina hnatlangpui cleanliness drive hi ramri veng duty, 20 Bn BSF sipai te pawhin an theih ang angin faina leh hriselna an kalpui thin thu leh faina chungchangah pawh awareness campaign neih thin a nih thu a sawi.

<><><>

## PC& AAP

Mizoram Aam Aadmi Party(AAP) leh PC Party ten Sawrkar khalh ngil tur leh ram leh mipuite hamthatna atan thawhho an tum tih an sawi a, Vawiin khan party 2 te hian Joint Meeting PC Party Office, Brig. T.Sailo Rûn, Treasury Square-ah an nei a, Meeting ah hian Office of Profit leh dan kalh MLA te chungchang te, Sawrkar hmalakna hrang hrang leh kal dan te sawiho a ni. Meeting-ah hian Party president ve ve Pu Vanlalruata leh Pu Andrew Lalremkima te an tel a ni.

<><><>

## CITIZENSHIP

Union Ministry of Home Affairs chuan Citizenship (Amemdment) Rules 2024 dan hmanga khua leh tui nihna a pek hmasak berte vawiin khan tihchhuah a ni. Union Home Secretary Ajay Kumar Bhalla chuan New Delhi ah citizenship certificate thar hi mi 14 hnenah a hlan a. Union Home Ministry chuan certificate hi email hmangin midang engemawzat hnenah thawn a ni a ti.

Union Home Secretary chuan Citizenship (Amendment) Rules,2014 hi kumin March ni 11 khan tihchhuah anih thu sawiin kum 2014 December ni 31 hmaa

Pakistan, Bangladesh leh Afghanistan atanga lo lut Hindu, Sikh, Jain, Buddhist, Parsi leh Christian sakhua te tana citizenship pekna a ni a ti.

<><><>

ALL 15 TRAPPED OFFICIALS OF HINDUSTAN COPPER LIMITED RESCUED FROM RAJASTHAN MINE

Nizan atanga Rajasthan-a thir laihchhuahna khura tang Hindustan Copper Limited official 15 te chu vawiin khan him taka chhanchhuah an ni. Vanduaina thlenna hi Neem Ka Thana district ah niin mi tang chhanchhuah zinga pakhat chu thih hlauhawmin a awm mek nia thudawn a ni a. Neem ka Thana Collector Sharad Mehra chuan mi tang chhanchhuah 14 hi Jaipura SMS hospitalah dahluh an ni tih sawiin pakhat erawh chu a thih leh dam finfiah turin company hospitalah lak a ni a ti. Nizan khan company official te hi thir laihchhuahna khura an inkhaina hrui a chah avangin an tang a ni.

Chetsualna thlen hnu lawkah chhanchhuah hna thawh nghal a ni a. Leihnuai metre 577 a thukah an tang a ni.

<><><>

NEWXCLICK FOUNDER RELEASED

Supreme Court chuan nikum October ni 3 a man NewsClick dintu Prabir Purkayastha a chhuah. Justice BR Gavai leh Sandeep Mehta te awmna bench chuan he thubuaia remand copy theluh anih loh avangin an man dan kha awmze nei lo a ni a ti a. Court chuan Prabir Purkayastha bail dan tur a siam dawn bawk a ni.

Purkayastha hi New York Times chanchinbuin China tan lam zawnga thu thehdarh turin sum a dawng nia a puh hnuah firfiakte manna dan, Unlawful Activities (Prevention) Act tlawhchhanin man a ni.kalha pawl dinah puangin kum nga chung helah a puang a ni.

<><><>